

# 1 SAN PEDRO ACHTOJ ITLAJCUILOL ON APÓSTOL SAN PEDRO

*Pedro quintlajcuilhuiya on tlaneltocaquej  
yejhuan chajchayajtinemij*

<sup>1</sup> Nejhua, Pedro, niiapóstol Jesucristo. Nemecht-lajcuilhuiya nemejhuatej yejhuan xn enchantij nemochan, yej nenchajchayajtinemij imanyan in-yehualican Ponto, Galacia, Capadocia, Asia niman Bitinia.

<sup>2</sup> Dios toTajzin omechtlapecpenijca para iconehuan pampa oquimat ica ipan in tonaltin nenquineltocasquej Jesucristo. Itechcpa on Espíritu Santo, Dios omechchipahuilij nemotlajtlacol para nenquitlacamatisquej Jesucristo niman para Cristo ma mechchipahua ican iyesyotzin. Xpiacan, tej, miyec tlatiochihualistli niman ylsehuilistli.

*Ma ticyectenehuacan Dios ipampa on  
tlamachalistli yejhuan melahuac*

<sup>3</sup> Ma ticyectenehuacan Dios iTajzin toTeco Jesucristo pampa ican hueyi iteicnelilis\* otechmacac yencuic nemilistli. Ijcon, tej, otitlacatquej ocssejpa. Yehua ica ticpiaj tlamachalistli yejhuan melahuac, pampa Jesucristo onoyolihuitij† niman onoquetzteu ipan itlalcon.

---

\* **1:3** su misericordia    † **1:3** resucitó; onoyolitij

**4** Niman no ijqui ticpiaj se herencia yejhuan Dios techehuilijtcaj ne ilhuicac. On herencia xqueman huelis xoxotonis, nion xhuelis ijtlacahuis, nion xhuelis polihuis icualtzinca.

**5** Niman pampa nemejhuamej nenquineltocaj Dios, yejhua mechmanahuiya ican ipoder hasta ipan on sa ica noch tonajli ijcuac mechititis ica yocaxitij nemotemaquixtilis.

**6** Yejhua ica, tej, nemejhuamej sanoyej‡ nempaquij masqui cas nenquijyohuisquej quesqui tonaltin miyec tlajtlamach§ tetlatlatalistli.

**7** Nemejhuamej nenquijyohuiyaj on tlajtlamach pajsolo huilistli niman tetlatlatalistli san para quitlatlatasquej nemotlaneltoc para nopantlantis tla melahuac nentlaneltocaj. Nenquimatiq quen ijqui on tlacamej quitlatlataj on oro ican titl para quitasquej tla melahuac noch yejhua. Tej, nemotlaneltoc más hueyi quijtosnequi xquen on oro yejhuan hueli popolihui. Tla cuajli quisas nemotlaneltoc itech on tetlatlatalistli, nenquiselisquej yectenehualistli niman hueyilistli niman tetlacaitalistli ipan on tonajli ijcuac Jesucristo huajlas ocsejpa.

**8** Nemejhuamej nenquitlajsojtlaj\* Jesucristo masqui xqueman onenquitaquej. Masqui aman xnenquitaj, nenquineltocaj niman nempaquij ican paquelistli yejhuan ajositicaj. In paquelistli sanoyej hueyi niman xhueli noch nenquipanextiaj ican tlajtojli.

**9** Pampa nenquineltocaj, nenquiseliaj temaquixtilistli para nemoalma.

---

‡ **1:6** muy    § **1:6** cosas    \* **1:8** le aman

**10** Ye huejcahui on tiotlajtojquej, yejhuan oquijtojquej ica nenquiselisquej in temaquixtilistli ican iteicnelilis Dios, oquitejtemojquej niman ican nochi inyojlo otetlajtlajtoltijquej para quimatisquej quen ijqui onyas in temaquixtilistli.

**11** Ijcuac on Espíritu yejhuan Cristo oquinmacac oquintitij on tlen Cristo quiyohuis niman saquin<sup>†</sup> quipias hueylistli, yejhamej quinequiyyaj quimatisquej aquinonon yejhua niman quemanon nochihuas.

**12** Dios oquinmachiltij on tlajtlamach yejhuan oquijtojquej. Yejhua oquinmachiltij ica xnochihuas chica nemij, yej nochihuas ijcuac miyec xipan yoticpanoquej. Aman, tej, Cristo ocuajtitlan on Espíritu Santo ne ilhuicac para quimpalehuis on yejhuan mechmachtiaj ica on temachtijli yejhuan quitemaca temaquixtilistli. Yejhamej ye mechijlianij ica nochihuas on tlen on tiotlajtojquej oquijtojquej ye huejcahui. Hasta sa no on ilhuicactequitquej<sup>‡</sup> cajsicamatisnequij on temaquixtilistli yejhuan Dios mechmaca.

*On tlaneltocaquej nonequi chipajtiasquej quen  
Dios chipahuac*

**13** Yejhua ica xtlamachilistlachacan para cuajli xtlanemilican. Cuajli xmoyecanacan. Xmachacan ican nochi nemoyojo iteicnelilis<sup>§</sup> Dios yejhuan nenquiselisquej ijcuac Jesucristo huajlas.

**14** Pampa neniconehuan Dios yejhuan nenquitlacamatij, ma ca xcahuilican on xcujli

---

<sup>†</sup> **1:11** después   <sup>‡</sup> **1:12** ángeles: Angeles tequitij ne ilhuicac niman nican ipan in tlalticpactli.   <sup>§</sup> **1:13** su misericordia

elehuilistli\* mechyeccanas yejhuan nenquipiayaj ijcuac xnenquixmatiyaj Dios.

**15** Yej xchijchipajtiacan ican noch i tlen nenziquihuasquej quen Dios chipahuac yejhuan omechnotz para nenziquiselasquej temaquixtilistli.

**16** Dios quijtohua ipan on Yectlajcuilojli: “Nemejhuamej xchijchipajtiacan pampa nejhua nichipahuac.”

**17** Tla nenziquitocayotiaj “toTajtzin” on yejhuan toDios, xquelnamiquican ica yejhua xtechicoita itech se tlacatl ihuan ocse ijcuac quintlaxtlahuilia, yej quintlaxtlahuilia quen se quichihua. Yejhua ica, tej, xtlacaitacan Dios ican nemojijli ipan noch tonaltin quech nennemisquej ipan in tlalticpactli. Niman xquelnamiquican ica tinemij ipan in tlalticpactli quen xtichanejquej.

**18** Dios, tej, omechquixtij ipan on nemilistli yejhuan onenquiselijquej intech on ye huejcahui nemotajhuan. Yejhua on xcuajli nemilistli xomechpalehuj. Niman nemejhuamej cuajli nenziquimatzoquej ica quech onotlaxtlau nemotemaquixtilis. On nemotemaquixtilis xonotlaxtlau ican tlajtlamach yejhuan tlamis quen yejhua on oro noso plata,

**19** yej ican on tlen patioj iyesyo Cristo. Yejhua onohuentlalij quen se borreguito yejhuan noch cuajli niman xquipia ijtlacahuilistli.

**20** Ijcuac in tlalticpactli xe oncatca, Dios oquitlapejpenij Cristo para quitoyahuas iyesyo niman ijcon mechmaquixtis. Pero Cristo san quemach onesico niman omic nemopampa.

\* **1:14** deseos

**21** Ipampa Cristo nemejhuamej nenquinelto-caj Dios, yejhuan oquiyolihuitij niman oquetzteu ipan itlalcon niman oquimacac hueyilistli. Ijcon, tej, nemejhuamej nenquipiaj nemotlaneltoc niman nemotlamachalis itech Dios.

**22** Aman pampa nenuquitlacamatij itlajtol Dios, nemoalma chipajquej para nenhuelisquej nenu-quintlajsojtlasquej<sup>†</sup> on tocniuhan. Yejhua ica sanoyej xmotlajsojtlacan inhuan ocsequimej ican nochi nemoyojojo.

**23** Nemejhuamej, tej, yonentlacatquej ocsejpa. Onenquiselijquej yencuic nemilistli yejhuan xqueman tlamis. Nemotajhuan niman nemonanhuan xomechmacac in yencuic nemilistli pampa on nemilistli yejhuan yejhuan omechmacaquej tlamis. Onenquiselijquej in yencuic nemilistli itechcopa itlajtol Dios, yejhuan oncaj niman onyas para nochipa.

**24** On Yeclajcuilojli quijtohua:  
Nochi tlacatl sa no ijqui quen itlaj xojtli, niman ihueyilis on tlacatl sa no ijqui quen on xochitl ne ipan on tepetl. On xojtli pilini niman huetzi ixochiyo,

**25** pero itlajtol Dios onyas para nochipa. On itlajtol Dios, yejhua on temachtijli yejhuan quitemaca temaquixtilistli yejhuan yomechijlijquej.

## 2

**1** Pampa nenquipiaj yencuic nemilistli, ma ca queman xchihuacan tlen xcujli. Ma ca xte-cajcayahuacan, nion ma ca xomexayacnemican,

---

<sup>†</sup> **1:22** los amarán

nion ma ca xtenexicolitacan, nion ma ca xijistlatican.

<sup>2</sup> Aman, tej, sanoyej\* xnequican on tlen nochitlajtol Dios quen on coconej yejhuan selicacoconej sanoyej quinequij chichisquej. Sanoyej xnequican para ica nemoscaltisquej chica neniseliaj temaquixtilistli,

<sup>3</sup> pampa cuajli yonenquimatzquej ica toTeco melahuac cuajli.

### *Cristo quen se tetlyejhuan yolticaj*

<sup>4</sup> Xnisihuican Cristo yejhuan quen se tetlyejhuan yolticaj. Dios oquitlapejpenij para quitlalis quen yecatztica yejhuan más hueyixtias tetl ipan itiopan. Masqui Dios oquitlapejpenij Cristo niman para yejhua sanoyej hueyi quijtosnequi, on tlacamej xoquiselijquej.

<sup>5</sup> Nemejhuamej no nenyoltoquej niman quen nentemej. Yejhua ica, tej, xmotemacakan para Dios ma mechtequitliti quen nentemej yesquiaj para quichijchihuas itiopan. No ijqui xmocahuilican para Dios ma mechtlati quen tiopixquej yejhuan chijchipajquej para nenquintlaliskej huentin yejhuan Dios huelis quiselis, pampa nenuineltocaj Jesucristo.

<sup>6</sup> Dios ipan in Yectlajcuilojli tlajtohua de Cristo: Xcaquican, nictlalia se tetlyejhuan para yecatztica ne ipan on chanyotl<sup>†</sup> itoca Sión. Onictlapejpenij yejhua in tetl, niman para nejhua in tetl sanoyej hueyi quijtosnequi. In tetl quijtosnequi noConeu. On yejhuan quineltucas yejhua, xqueman pinahuas.

---

\* **2:2** mucho    † **2:6** casa; cajli

**7** Aman yejhua no sanoyej hueyi quijtosnequi para nemejhuamej yejhuan nentlaneltocaj. Pero para on yejhuan xtlaneltocaj, impan nochihua yejhua in tlen quijtohua in Yectlajcuilojli:

On tetl yejhuan on tepanchijchiquej xoquiseli-jquej, aman yejhua yonothalij yecatztica.

**8** Niman no impan nochihua on tlen quijtohua in Yectlajcuilojli:

Oncaj se tetl yejhuan ica nocxitechacuanihua, niman in tetl hueli tetlajcali. Yejhuamej nocxitechacuaniaj sa no ijqui quen Dios oquintalilij ica nochihuas ipan pampa xquitlacamati on itemachtil.

### *Nemejhuamej omechtlapecpenij Dios*

**9** Pero nemejhuamej Dios omechtlapecpenij, niman nentiopixquej para nenquipalehuisquej toRey. Niman nemejhuamej no nentlaneltocaquej yejhuan chipajquej, niman nemejhuamej no nenteyaxcahuan‡ itech Dios. Niman nochihua in onochiu para nenquiteijlisquej ihueyilis Dios yejhuan omechquixtij ipan on tlayehualyotl, niman omechhuicac ipan on cuajli tlahuilji.

**10** Achtoj nemejhuamej xnenteyaxcahuan catcaj itech Dios, pero aman neniyaxcahuan. Achtoj xnenquimatiyaj iteicnelilis§ Dios, pero aman yonenquiselijquej iteicnelilis.

*On tlaneltocaquej xquintocarohua quichihuasquej on tlen xcuaajli*

‡ **2:9** le pertenecen; nenteaxcahuan, nentehuaxcahuan, nentetlatquihuan    § **2:10** su misericordia

**11** Notlajsojcaicnihuan, nenquimatiij ica aman nemejhuamej nenchanejquej ne ilhuicac masqui nenchantij quesqui tonaltin más nican ipan in tlalticpactli. Yejhua ica sanoyej nemechtlajtlanilia ma ca xcahuilican ma mechyecana on xcua-jli nemoelehuilis\* yejhuan noxixicohua ihuan nemoalma.

**12** Xmohuicacan cuajli imixpan on yejhuan xquixmatij Dios. Ijcon masqui cas quitenehuaj ica yonenquichijquej on tlen xcua-jli, yejhuan quitasquej on tlen cuajli yejhuan nemejhuamej nenquichihuaj. Niman quemaj quiyectenehuasquej Dios ijcuac ajsis on tonajli para techtlaxtlahuilis.

*On tlaneltocaquej nonequi quintlacamatisquej  
on tequihuajquej niman on inteco*

**13** Xquintlacamatican nochí on tequihuajquej yejhuan on tlacamej quintlaliaj para ijcon nochimej quitlacaitasquej toTeco. Xtlacamatican on más hueyi tequihuaj emporador yejhuan quipia más hueyi tequihuajyotl.

**14** Niman no xquintlacamatican on tequihuajquej gobernadores yejhuan quinmactilia on tlanahuatijli para quincastigarosquej on yejhuan quichihuaj on tlen xcua-jli, noso para quintlacaitasquej on yejhuan quichihuaj on tlen cuajli.

**15** Xquintlacamatican ijcon pampa Dios quinequi xchihuacan on tlen cuajli para on yejhuan tzonteconchicajquej xhuelis itlaj mechijtohuilisquej.

---

\* **2:11** deseos de ustedes

**16** Xmohuicacan quen tlacamej yejhuan tlamacaltin. Pero ma ca xnemilican pampa nemo-macahualis, nenhuelisquej nenquichihuasquej on tlen xcuajli. Yej más cuajli xmohuicacan quen itlaco-hualhuan Dios.

**17** Cuajli xquintlacaitacan nochimej, xquintlaj-sojtlacan<sup>†</sup> nochimej tocnihuan, xtlacaitacan Dios, niman xtlacaitacan on más hueyixticas quej tequihuaj.

**18** Nemejhuamej tlanamactin, xquintlacamatitan nemoteco ican nochit tetlaca-italistli. Ma ca san xquintlacamatican yejhuatej on yejhuan cuajcualtin niman tenotzquej, yej no yejhuatej on yejhuan xcuajcualtin.

**19** Tla nenquixicohuaj on tlajyohuclistli yejhuan xmechtocarohua nenquipiasquej san pampa nenquimatiq quen ijqui Dios quinequi para nemo-huicasquej, tla ijcon, mechtlacaitas quej.

**20** Pero tla nemejhuamej nenquichihuaj itlaj tlen xcuajli, niman yejhua ica mechcastigarohuaj, xacaj mechtlacaitas. Pero tla nentlajyohuiyaj pampa onenquichijquej on tlen cuajli, niman cuajli nenquixicohuaj ican yolsehuclistli, quemaj Dios mechtlacaitas.

**21** Dios omechnotz para nenquichihuasquej on tlen cuajli masqui nentlajyohuisquej. San yejhua Cristo otlajyohuij nemopampa, niman ijcon omechititij quen ijqui no nonequi nenquichihuasquej.

**22** On Yectlajcuilojli quijtohua itech ica Cristo: Yejhua nion se tlajtlacojli xoquichi, nion ocaj-cayau yacaj.

**23** Ijcuac on tlacamej ocuijhuicaltijquej Cristo, yejhua xotlananquiliq ican tlahu-

<sup>†</sup> **2:17** ámenlos

jhuicaltilistli. Ijcuac oquitlajyohuiltyquej, xoquijtoj ica quincojcocos nion quinmictis, yej oquinmactilij Dios yejhuan nochipa tetlaxtlahuilia quen nonequi.

- <sup>24</sup> Ne ipan cojnepanojli‡ sa no Cristo oquiselij castigo ipan itlalnacayo ipampa totlajtlacol, para tejhuamej ma ticajcahuacan on ica titlajtlacohuaj niman para ma tiyolmelaj-canemican. Aman Dios yomechtlapojojhuij ipampa on tlen oquijyohuoj Cristo.
- <sup>25</sup> Nonequia para Dios mechtlapojojhuis pampa nenchayacaquistinemiyaj itech iojhui quen borreguitos yejhuan polijtinemij. Pero aman yonenhualajquej itech Cristo yejhuan mechtlajpia quen se tlajpixqui niman yejhuan quimejehua nemoalmas.

### 3

*On yejhuan tehuan nemij nonequi chantisquej  
ican tetlacaitalistli*

<sup>1</sup> Sihuamej, no ijqui xtlacaitacan nemohue-huentzin. Ijcon, tej, tla se de nemejhuamej quipia ihuehuentzin yejhuan xquineltoca itemachtil Dios, huelis noyolehuas ica on quen tejua timohuicas, niman xafuerza ticnojnotzas,

<sup>2</sup> pampa quitas quen ican chipahualistli timohuica, niman quen ijqui tictlacaita Dios.

<sup>3</sup> Nemocuatzinca xquitocarohua hualehuas itech on tlajmachyotl\* yejhuan tlachijchiutli ican oro, noso itech on tlaquentin yejhuan

---

‡ 2:24 cruz    \* 3:3 adorno

cualtzitzintin, noso tla notzonmalinaj sanoyej<sup>†</sup> caultzin.

<sup>4</sup> Yej nemocualtzinca<sup>‡</sup> nonequi quisas ipan nemoyojlo, ijcon quen se sihuatl quisa icualtzinca ipan iyojlo ijcuac yolyemanqui<sup>§</sup> niman tenotzqui. In, tej, yejhua hueyi quiitosnequi ixpan Dios.

<sup>5</sup> Ye huejcahui on sihuamej yejhuan chipajquej catcaj niman quineltocayaj Dios ijcon onocualtz-intilijcaj. Cada se de yejhuamej quitlacamatiya ihuehuentzin

<sup>6</sup> ijcon quen Sara, yejhuan quitlacamatiya Abraham niman oquitlacaitac ijcuac oquito-cayotij “noteco.” Nennemisquej quen Sara tla nenquitocasquej iejemplo ica nenquichihuasquej on tlen cuajli niman xitlaj\* nenquimacajsiquej.

<sup>7</sup> Tlacamej, xmotencaquican cuajli inhuan nemosihuahuan. Niman xquintlacaitacan quen nonequi pampa yejhuamej más malhultin xquen nemejhuamej, niman pampa yejhuamej no nemohuan quiselisquej se nemilistli yejhuan Dios otechmacac ican iteicnelilis<sup>†</sup>. Ijcon cuajli xmohuicacan inhuan nemosihuahuan para ma ca itlaj quitzacuilis nemooraciones.

*Yejhuau tlajyohuiyaj ipampa on tlen cuajli quichihuaj quiselisquej itlatiochihualis Dios*

<sup>8</sup> No sa ica nochí, nemochimej cuajli xnemican sequimej inhuan ocsequimej ican pactli. Xmajmanacan ijcuac se itlaj cajmana. Xmotlajsojtlan-can<sup>‡</sup> sequimej inhuan ocsequimej quen icniutin. Xteicnelican niman xyolyemanixtacan.

---

† 3:3 muy      ‡ 3:4 su belleza  
coxtla      † 3:7 su misericordia

§ 3:4 humilde      \* 3:6 nada;  
‡ 3:8 ámense

<sup>9</sup> Tla yacaj itlaj mechchihuilis tlen xcuajli, ma ca no ijqui nencuepilisquej, noso tla yacaj mechtenehuilia on tlen xcuajli, ma ca no nenquitenehuilisquej on tlen xcuajli. Yej xcuepilican ican tlatiochihualistli, pampa Dios omechnotz para ijqui nemohuicasquej, niman ijqui nenquiselisquej se tlatiochihualistli.

<sup>10</sup> Nemechijlia ijquin pampa on Yectlajcuilojli quijtohua:

On yejhuan quinequi paquis ipan inemilis niman quinequi quipanos ican cuajli tonaltin, ma quejehua inenepil para ma ca ma quijto on tlen xcuajli, niman iten para ma ca yacaj ma cajcayahua.

<sup>11</sup> Ma ca sa ma quichihua on tlen xcuajli, niman ma quichihua noch i tlen cuajli. Ma quiteitemo yolsehuilistli inhuan ocsequimej niman ican noch iyojlo ma quejeco quipias.

<sup>12</sup> Ma quichihua noch i tlajtlamach§ pampa Dios quintlacaita on yejhuan yolmelajquej\*, niman caqui inoración. Pero yejhua xquinchihuilia cuenta yejhuan quichihuaj tlen xcuajli.

<sup>13</sup> Tla ican nemoyojlo nochipa nenquichihuaj on tlen cuajli, ¿aquinon, tej, mechpajsolos?

<sup>14</sup> Pero tla nentlajyohuiyaj pampa nenquichihuaj on tlen cuajli, nenquiselisquej itladiochihualis Dios. Yejhua ica ma ca xmomojtican ica on tlen quijtohuaj niman quichihuaj, nion ma ca xcomatztiacan.

**15** Yej ipan nemoyojo xtlacaitacan Cristo ica yejhua nemoTeco. Nochipa xnemican listos para nenquinnanquilisquej nochimej on yejhuan mechtlajtoltisquej de nemotlamachalis. Pero ijcuac nenquinnanquilisquej, xchihuacan ican yolyemanilistli niman tetlacaitalistli.

**16** Ma ca xcahuilican nemotlamachilis ma mechtlajtlacolmacakan. Ijcon on yejhuan mechtenehuiliaj on tlen xcuajli, pampa cuajli nemohuicaj itech Cristo, pinahuasquej itechcopa intlajtol.

**17** Más cuajli nentlajyohuisquej ipampa on tlen cuajli nenquichihuasquej, tla Dios quinequi, xquen tla nentlajyohuisquej ipampa on tlen xcuajli nenquichihuasquej.

**18** Sa no yejhua Cristo otlajyohuij niman omic ipampa totlajtlacolhuan. Yejhua omic san sejpa para nochipa. Yejhua yejhuan yolmelajqui, omic topampa yejhuan xtiyolmelajquej para techhuicas itech Dios. Itlalnacayo omic pero iEspíritu oyoliu<sup>†</sup>.

**19** Niman Cristo ican iEspíritu oyaj para oquin-machtiton almas yejhuan tzacuticatcaj.

**20** Yejhuatej onencaj ye huejcahui sa no ipan on tonaltin ijcuac nemiya Noé. Niman nochia on tonaltin chica Noé quichijchihuaya on acajli<sup>‡</sup>, yejhuan Dios oquinahuatij para ma quichijchihua, Dios quinchaya xican tlahuejli para quitlacamatisquiaj, pero yejhuatej ononenecquej. Xquelnamiquican ica ipan on acajli Dios oquimaquixtij san quesquimej

---

<sup>†</sup> **3:18** resucitó    <sup>‡</sup> **3:20** arca de Noé

tlacamej, san chicueyimej tlacamej. Yehua oquinmaquixtij ipan atl.

<sup>21</sup> Niman yehua on atl, aman yehua quinxnescayotijticas yehua on tlacuatequelistli. Ijcuac otitocuatequijquej, onoteititij ica yotimaquisquej itechcopia iyolihuilis Cristo ijcuac Dios oquetzteu ipan itlalcon. On tlacuatequelistli xoquichipau tonacayo, yej onoteititij ica tictlajtlaniliaj Dios para se toyoljo yehuan xtechtlatlaco macas.

<sup>22</sup> Aman Cristo nemí ne ilhuicac iyecmacopa Dios campa oncaj tetlacaitalistli niman tlanahuatijli niman campa on ilhuicactequitquej\* niman on tequihuajquej niman on yehuan quipiaj poder quitlacamatztoquej.

## 4

### *Nonequi tinemisquej quen Dios quinequi*

<sup>1</sup> Cristo otlajyohuij ipan itlalnacayo. Yehua ica nemejhuamej no xnemican listos quen yehua para nenquiselisquej tlajyohuclistli. Niman xquellnamiquican ica on yehuan tlajyohuiya ipan itlalnacayo cajcahua on tlajtlaco jli.

<sup>2</sup> Ijcon, tej, chica yehua nemis ipan in tlalticpactli, xoc quitucas on xcua jli elehuilistli\* yehuan itlalnacayo quinequi, yej quitucas on tlen Dios quinequi.

<sup>3</sup> Ipan on tonaltin catcaj, nemejhuamej onenquichijquej miyec xcua jli quen on yehuan xquixmatij Dios. Nenquichijtetziyaj noch xcua jli yehuan ohuajlaj ipan nemotlamachilis,

---

§ **3:21** simbolizando \* **3:22** ángeles: Angeles tequitij ne ilhuicac niman nican ipan in tlalticpactli. \* **4:2** deseo

onenquelehuijquej on tlen xcuajli, niman onentlahuantinencaj. Onenquichijquej xcuajli ilhuimej, niman ipan ilhuimej sanoyej<sup>†</sup> nentlahuaniyaj, niman nenquinhueyiliayaj on tlamachijchihualtin nemotajtzitzihuan yejhuan Dios xmechcahuilia.

<sup>4</sup> Aman yejhuamej on yejhuan xquixmatij Dios, xcajsicamatij tlica<sup>‡</sup> xoc nemonelohuaj inhuan ipan on miyec xcuajli tlajtlamach<sup>§</sup> yejhuan quichihuaj. Yejhua ica yejhuamej mechtenehuiliaj tlen xcuajli.

<sup>5</sup> Pero yejhuamej ica oncaj quixpantilisquej Cristo nochí on tlen xcuajli quichihuaj. Niman Cristo nemi listo para quinyolcuitis niman quintlaxtlahuilis on yejhuan nemij niman no on yejhuan yomiquej.

<sup>6</sup> Yejhua ica yejhua no oyaj niman oquimijlij on yejhuan yomiquej on cuajli tlajtojli yejhuan quitemaca temaquixtilistli. Dios ye quintlaxtlahuilia ipan intlalnacayo ican miquilistli ijcon quen quintlaxtlahuilis nochí tlacatl. Pero Cristo oquimijlij on cuajli tlajtojli de temaquixtilistli para inalmas huelisquej nemisquej quen Dios nemi.

*Nochi on tlaneltoaquej nonequi nohuicasquej cuajli ipan in sa ica nochí tonaltin*

<sup>7</sup> Ye nisu para tlamic nochí tlajtlamach. Yejhua ica, cuajli xnemilican niman cuajli xmocahuacan para nenhuelisquej nenquichihuasquej oración.

<sup>8</sup> Yejhua in hueyi quijtosnequi. Sanoyej xmotlajsojtlatihiyan ihuan ocsequimej pampa tla

---

<sup>†</sup> 4:3 mucho    <sup>‡</sup> 4:4 por qué; tline    <sup>§</sup> 4:4 cosas

melahuac nenquintlajsojtlaj\* ocsequimej, nenquintlapojojpolhuisquej masqui miyecpa tlajtla-  
cosquej nemotech.

<sup>9</sup> Cuajli xquinselican ocsequimej nemochan ni-  
man ma ca xquichtacatlatohuilican nemojti-  
copa.

<sup>10</sup> Dios omechmacac nemejhuamej on tetlay-  
ocoliltin yejhuan mechhueliltia on tlen aman  
hueli nenquichihuaj. Niman cada se de neme-  
jhuamej omechmacac tetlayocoliltin sesetlamant-  
tic. Yejhua ica, nochipa ijcuac nenhuelisquej, cuaj-  
li xtequitiltican on tlen Dios omechmacac para  
nenquimpalehuisquej ocsequimej.

<sup>11</sup> Ijcuac yacaj temachtis, ma temachti ican  
itlajtol Dios. Ijcuac yacaj quintequipanohua  
ocsequimej, ma quichihua ican on chicahual-  
istli yejhuan Dios quimaca. Ijcon Dios quiselis  
yectenehualistli itechcopia Jesucristo. Niman  
quipias hueyilistli niman poder para nochipa. Ma  
ijqui nochihua.

### *Nentlajyohuiyaj pampa nenquineltocaj Cristo*

<sup>12</sup> Notlajsojcaicnihuan, ma ca ma mechmojcat-  
lachaltican on tecocoj tetlatlatalistli yejhuan nen-  
quijyohuiaj. Ma ca xnemilican ica itlaj yencuic  
yohuetz nemopan yejhuan xqueman huetzi im-  
pan ocsequimej.

<sup>13</sup> Yej xpaquican ica no nenquipiaj sequi it-  
lajyohuilis Cristo para no más sanoyej nem-  
paquisquej ijcuac nopanextis ihueyilis.

<sup>14</sup> Tla on tlacamej mechtenehuiliaj on tlen  
xcuajli pampa nenquineltocaj Cristo, nenquiseliaj

---

\* **4:8** aman a ellos

itlatiochihualis Dios, pampa on Espíritu Santo yejhuan quipia hueyilistli nemí nemopan. On tlacamej quiñtohuaj on tlen xcuajli itech Cristo, pero nemejhuamej nenquitlacaitaj.

<sup>15</sup> Tla se de nemejhuamej tlajyohuia, ma ca ma tlajyohui pampa yejhua otemicij, noso ot-lachtec, noso xnohuica ipan itlanahuatil on gobierno, noso nocalactia campa xquitocarohua.

<sup>16</sup> Yej tla se de nemejhuamej tlajyohuia pampa yejhua quineltoca Cristo, xquitocarohua pinahuas, yej ma cueyili Dios pampa yejhua tlaneltoquaquetl.

<sup>17</sup> Ye huajlau on tonajli para Dios quinylcuitis niman quintlaxtlahuilis yejhuan tiiconehuan. Tla yejhua toca pehuas ica techcastigaros tejhuamej yejhuan tiiconehuan, ¿quen ijqui quisasquej on yejhuan xquitlacamatij on temachtijli yejhuan quitemaca temaquixtilistli?

<sup>18</sup> On Yectlajcuilojli quiñtohuia:  
Tla on yejhuan cuajcualtin sa axcan huelij no-maquixtiaj, ¿tlinon impan nochihuas on yejhuan xcuajcualtin niman on tlajtlacole-jquej?

<sup>19</sup> Ijcon, tej, nemejhuamej yejhuan nentlajyohuiyaj pampa Dios quinequi, cuajli xchijtiakan quen mechtocarohua. No ijqui, xmactilican nemoalma Dios yejhuan omechchijchiu niman nochipa quichihua quen quitocarohua.

## 5

*Pedro quintlacanonotza on tlajtlajmatquej*

*tlayecanquej itech tocnihuan niman on telpocamej*

<sup>1</sup> Aman nicnequi niquntlacanonotzas on tlajtlajmatquej tlayecanquej yejhuan nemij ipan nemotiopanhuan. Nejhua no nitlajtlajmatqui tlayecanquetl itech tocnihuan. Oniquitac Cristo ijcuac otlajyohuij niman no nicpias sequi ihueyilis yejhuan huajnonextis.

<sup>2</sup> Xquintlajpiacan iconehuan Dios yejhuan yejhua omechmactilij para nenquincuidarosquej. Xquimpiacan quen se tlajpixqui quimpia iborreguitos. Ma ca xchihuacan pampa tla yacaj mechchihualtia, yej ican cuajli nemoyojo quen Dios quinequi. Ma ca xchihuacan pampa nenquinequij nenquitlanisquej tomin, yej san pampa nenquinequij nentequitisquej para Dios.

<sup>3</sup> Ma ca xquimpiacan quen nemotlactihuán on yejhuan Dios omechmactilij para nenquintlajpiasquej, yej xquinyecanacan ican cuajli ejemplo.

<sup>4</sup> Ijcuac huajnonextis Cristo, yejhuan quinmandarohua on tlajpixquej, nenquiselisquej se tetlayocolijli sanoyej\* caultzin yejhuan xqueman popolihui xquen se tetlayocolijli yejhuan ticseliaj ipan in tlalticpactli.

<sup>5</sup> Telpocamej, no ijqui xquintlacamatican on yejhuan más huehuentzitzintin. Xmohuicacan ihuan ocsequimej ican yolyemanilistli† pampa on Yectlajcuilojli quijtohua:

Dios xquinselia on yejhuan nohueyimatquej, pero yejhua quimpalehuiya ican iteicnelilis‡ on yejhuan yolyemanquej.

---

\* <sup>5:4</sup> muy    † <sup>5:5</sup> humildad    ‡ <sup>5:5</sup> su misericordia

<sup>6</sup> Yejhua ica xmoyolyemanilican ixpan Dios yejhuan quipia nochí poder, niman mechmacas tetlacaítalísti ipan on tonajli yejhuan oquitlapejpenij.

<sup>7</sup> Xmactilican Dios nochí on tlajtlamach§ yejhuan san nencomatztoquej pampa yejhua quinequi mechpalehuis.

<sup>8</sup> Cuajli xnemilican niman xtlachixtiacan, pampa nemotlahuelicniu on diablo quinequi mechxoxotonis. Yejhua quistinemi quen itlaj león yejhuan nanalcatinemi niman quitejtemojtinemi aquinon quicuas.

<sup>9</sup> Ma ca xtlacamatican on diablo, yej xmelaj-canemican ipan nemotlaneltoc. No ijqui xmatzti-acan ica nochihuiyan imanyan in tlalticpactli on nemocnihuan no ijqui quen nemejhuamej tlajyohuiyaj.

<sup>10</sup> Saquin ijcuac nemejhuamej yonentlajyohuiquej ipan quesqui tonaltin, sa no Dios mechcuelatlalis, mechmelajcapias, mechcojtilis, niman mechyeectlalis ipan nemotlaneltoc. Sa no yejhua Dios techmaca nochí iteicnelilis, niman otechnotz para ticpiasquej ihueyilis itechcopa Cristo yejhuan para nochipa onyas.

<sup>11</sup> Ma yejhua quipia hueyilistli niman poder para nochipa. Ma ijqui nochihua.

### *Pedro tetlajpalohua*

<sup>12</sup> Yonemechtlaçcuilhuij ican quesqui tlajtojli ipan yejhua in tlajcuilolamatl yejhuan tocniu Silvano oquijcuiloj quen nejhua oniquijlij. Nejhua

cuaqli nicmati ica yejhua cuajli iyojlo. Onemecht-lajcuilhuij para onemechtlacanonotz niman one-mechpantlantilij ica iteicnelilis\* Dios melahuac. Xmelajcanemican ipan on teicnelilistli.

<sup>13</sup> Icone huan Dios yejhuan nemij nican ipan Babilonia, niman yejhuan no oquintlapejpenij quen nemejhuamej, mechtlajpalohuaj. Niman Marcos yejhuan quen noconeuyesquia, mechtlajpalohua.

<sup>14</sup> Xmotlajpalocan nochimej ihuan ocsequimej ican tetlajsojtlalistli<sup>†</sup>.

Xpiacan yolsehuilistli nemejhuamej yejhuan nennemij san secan ihuan Jesucristo. Ma ijqui nochihua.

---

\* **5:12** su misericordia   † **5:14** Ipan griego quijtohua: “ican yectli tlatencuajli.” Tlatencuajli quijtosnequi beso.

**In yencuic iyectlajtoltzin Dios itech ica  
toTeco Jesucristo  
New Testament in Nahuatl, Guerrero  
(MX:ngu:Nahuatl, Guerrero)**

copyright © 1987 Wycliffe Bible Translators, Inc.

Language: Nahuatl, Guerrero

Translation by: Wycliffe Bible Translators, Inc.

Náhuatl, Guerrero [ngu], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nahuatl, Guerrero

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
f85e296d-89bd-5d7f-b7c2-328bd8e643b1